




220255

220257^P

Mag. St. Dr.

kat. komp.



EPISTOLA

Excellentissimi Illustrissimi & Reverendissimi Domini Josephi Comitis GARAMPI Archiepiscopi Berytensis, Sanctissimi Domini Nostri Domini PII Divina Providentia PAPÆ VI. & Sanctæ Sedis Apostolicæ in Regno Poloniae & Magno Ducatu Lithuaniae, cum Facultatibus Legati de Latere NUNTII, ad Admodum Reverendos Patres Priores Provinciarum & Conventuum Ordinis Prædicatorum in Regno Poloniae & Magno Ducatu Lithuaniae existentium. Data Varsavia

Die 10. Martii 1775.

220255



Tñ scio tristissimum me vobis, Reverendi Patres, nuntium allaturum ex obitu Clarissimi Viri, & eximii nostro ævo ornamenti Ordinis vestri; tamen quoniam interest, & vestræ caritatis Fratrum animas hac luce defunctas precibus apud Omnipotentem DEUM sublevare, & virtutis vestræ præclara eorum exempla desumere atque imitari, non dubitavi, quin certiores quoquo modo Vos facerem.

Pater Bernardus Maria de Rubeis celeberrimus hic Vir est, qui ante diem V. Kalendas Februarias mortem cum vita commutavit. Satis est eum vobis nominasse, ut statim sentiat, quanto eius desiderio teneri debeatis. Nota enim non vobis modo, sed universæ Europæ est summa ejus in divinis humanisque literis doctrina, acere ac prudens in iis pertractandis iudicium; tum ea denique pro Religione ac literis assiduorum laborum studiorumque monumenta, quæ plurima nobis reliquit. Ad hæc accedebat mira hominis modestia, caritas, Religiosæ paupertatis ac Regularis observantiæ servandæ diligentissimum studium; quæ omnia cum tanta eruditione, tantisque laboribus, præclare ab ipso copulata, dignum præsentibus & posteris statuerunt exemplum, quod sectarentur.

Nulla penitus inter diei horas inveniebatur, quam is otio relinqueret. Quidquid supererat temporis à Religiosi pientissimique hominis officiis, totum studiis impendebat. Consortia hominum, si vacua instructionis, vel propriæ, vel alienæ, omnino vitabat. Nihil à constanti hac vitæ methodo ad extremum usque spiritum per integros septuaginta Religiosæ suæ vitæ annos eum unquam revocavit. Valetudinem sola sobrietate, eaque adeo arctâ sustentabat, ut perpetuum veluti jejunium sibi indixisse videretur: nullo enim alio pacto assiduum studiorum laborem sustineri posse iudicabat. Tali vitæ ratione ad extremam usque senectam perveniens, nihil de assuetis laboribus remisera, nec nisi quinque ante obitum diebus manum de tabula retraxerat. Nunquam vivere sibi visus est, nisi quidquid virium haberet, totum Ecclesiæ utilitati & proximorum instructioni consecraret. Licet enim venerabilis senex octo supra octuaginta annorum ætatem ageret, cum tamen de modo præsentis Realis JESU CHRISTI in Eucharistia explicando præclara multa concessisset, novum de ea re Tractatum aggressus est, quem morte interceptus posthumum suis Fratribus reliquit.

) 1 (

En



Teolog. pol. 7051.



En igitur hominem de Religione, de Literis, de Ordine vestro optime meritum, quem precibus vestris enixè commendo, Reverendi Patres: en exemplum quod vobis ad imitandum propono. Atque ut ornatorem de ejus virtutibus notitiam habeatis, exemplar Epistolæ, quam Admodum Reverendus Pater Joannes Maria Contareus Collegii Sanctissimi Rosarii Præses ad Congregationem suam dedit, hisce literis subijcio, ejusque officii ac pietatis sensibus meos quoque conjunctos esse maxime volo. Etenim si cohortatio mea, ut demortui hominis animæ preces vestræ suffragentur, & pium & justum officium est, debitumque veteri amicitiae, quæ inter me ac Religiosum Virum intercessit; eo etiam spectat, ut vos excitet ad tanti Viri persequenda vestigia.

Tali igitur proposito exemplo inflammantur Juvenum animi ad magis magisque proficiendum in humanis divinisque literis: augeant si opus est sedulitatem, tum Magistri in iis erudiendis, tum Superiores in institutionis opere tam salutari ac necessario coadjuvando, atque in omnibus familiis suis pro viribus promovendo. Singuli denique in eam curam certatim incumbant, ut vocationis officia ac munera accurate adimpleant, & tanquam veri filii S. Patriarchæ Dominici, atque Angelici Doctoris Discipuli, universæ huic nationi exemplo ac doctrina præluceant, & Ecclesiæ, reique publicæ utiliores in dies reddantur.

Quæ omnia, opera consilio & autoritate quâ pollebat in Congregatione sua, maxime præstitit Vir Clarissimus piæ memoriæ. Hinc ex ejus schola prodire is idem, quem honoris causa nomino, Pater Contareus, PP. Daniel & Nicolaus Concina, PP. Patuzzi & Finetti, & qui ex eadem Congregatione Ordinem vestrum universamque literariam rempublicam nostro ævo præclare ornat, P. Antoninus Valsechi princeps sacrarum literarum in Gymnasio Patavino Antecessor, ac Operis de *Fundamentis Religionis & Fontibus impietatis*, apud bonos ubique gentium celebratissimi, nec unquam satis digne laudandi auctor, cuius benevolentia & familiaritate maxime glorior ac delector.

Iisdem igitur vestigiis & Vos insistite. Mihi vero dum Vobis etiam atque etiam commendo animam hominis præstantissimi, mihiq; amicissimi, fratris vestri illustris, ac Viri in literaria republica Clarissimi, gratum maxime est, novum hoc Vobis dare testimonium amoris studiiq; mei erga inclytum Ordinem vestrum, omnesque ejus Instituti sectatores; ac DEUM O. M. etiam atque etiam precor & oro, ut Vos, Reverendi Patres, dignos reddat, qui tantum Virum accurate imitemini atque exprimatis.

Legatur Epistola hæc omnibus Fratribus in unum collectis, ac peculiare preces et suffragia pro defuncti Animæ requie indicantur. Valete. Dat. Varsaviæ hac die 10. martii anni 1775.

E P I S T O L A

Admodum Reverendi Patris Joannis Mariæ Contareni Rectoris Collegii SS. Rosarii Congregationis B. Jacobi Salomonii Ordinis Prædicatorum ad Superiores Conventuum ejusdem Congregationis. Data Venetiis die 4. Februarii Anni 1775.



IN funere Clarissimi Viri R. Adm. P. L. Bernardi Mariæ de Rubeis, quod ex fraternæ, quo adstringimur, caritatis vinculo vobis de more nunciamus, diro sauciati vulnere, & amaro perciti dolore cum Propheta lugemus: *conversus est in luctum chorus noster, cecidit corona capitis nostri.* Abiit ille quidem ad plures grandævus, & qui, ut ipse iam moriturus dixerat, satis superque sibi

sibi vixit, quippe qui octuagesimum octavum annum a viginti diebus expleverat; at immature, & nimium propere nobis, qui in senili & gracili corpore, ossibus tantum & arida pelle illa regente compacto, animum, mentem, spiritum, ingenii aciem, memoriam; & hæc omnia quidem nullo pacto annis & senio vel detrita vel imminuta, sed fulgida, firma, vigentia, & ad omnia rationalis vitæ munia prompta adeo & expedita admirabamur, ut aliquot saltem annos prodigiosum senem nobiscum victurum consideremus. Verum raptus est: *placita enim erat Deo anima eius*, quam ipse liberali & largo suæ Divinæ gratiæ munere, scientia, & doctrina cumlaverat, virtutibus ornaverat, religiosa vocatione selegerat. Et, ut ab hoc postremo exordiamur, Forojulii nobili genere natus, mundo nuncium remittens, in nostra Congregatione religiosum amplexus est Institutum, & expleto probationis anno, ætatis suæ decimo septimo, sua solemnia vota Deo nuncupavit. Florentiam deinde missus, in Cœnobio Sancti Miniati Philosophiæ cursum explevit; dein ad suos revocatus, statim in Theologicis studiis tam præcipuum ingenii sui specimen exhibuit, ut coeperit apud nostros & apud externos inclarescere. Quamobrem vix Lector renunciatus, a Venetis Serenissimæ Reipublicæ extra ordinem Legatis ad Ludovicum XV. Parisios proficiscentibus in Theologum electus, non consentientibus solum, sed & plaudentibus Ordinis nostri moderatoribus, è florentissima illa regione uberes reportaturus fructus, illuc profectus est. Nec fefellit eventus; ad nos enim reversus, & studiis totus addictus, quantas charus noster scientiæ & eruditionis divitias sibi comparaverit, nullus est qui ignoret in tot iam voluminibus effusas. Nullum est, pene dixerim, doctrinæ genus, quod non excoluerit, quod non possederit, quod non leviter illustraverit. Fidei dogmata propugnavit; Philosophica, & Theologica studia promovit; primus inter nos utramque Facultatem scholasticis tricis nimis implicitam in nobiliorem formam restituit, dogmaticas & eruditas disputationes scholasticis addere & immiscere quæstionibus, suo nos exemplo docuit: quod postea subsecuti Theologi longe uberiore utilitate & profectu sunt imitati. Divi Thomæ doctrinam, cui semper constanter adhæsit, illustravit, vindicavitque; ejus Operum accuratorem editionem curavit, & dissertationibus locupletavit. Historiæ quoque Ecclesiasticæ plura & nova addidit monumenta; sacram chronotaxim in nonnullis capitibus emendavit, aptius & verius digessit. Codices, diplomata, numismata, monetas, syngrapha, vel detexit, vel indicavit, vel publici juris fecit, atque explicavit. Græci quoque idiomatis non ignarus, aliquos Scriptores à mendis purgare potuit, & veræ lectioni restituere. Supra triginta sunt volumina a Concellita nostro eruditissime elucubrata, quæ nomen eius in literaria Republica clarum reddidere & celeberrimum. Ejus itaque fama totam Europam pervagata, Eruditorum amorem, existimationem, benevolentiam illi promeruit; & ab omnibus magno in pretio habitus, à pluribus commendatus, à non paucis ad sua erudita confirmanda placita tamquam idoneus testis adscitus. Plura possem, si brevis nostra pagella concederet, clarissimorum Virorum nomina recensere, qui charum nostrum plurimi fecere, encomiis celebrârunt, ornârunt laudibus: Lamium, Muratorium, Fontaninum, Mapheium, Ballarinos Fratres, Philippum a Turre Adriensem Episcopum illi etiam arcta cognatione conjunctum, aliosque. At binos præterire non possum, quippe qui illum penitus cognoverunt & frequentârunt celeberrimos viros Apostolum Zenonem, & amplissimum Senatorem ac eruditissimum Flaminium Corneliolum, quorum prior fato functus non semel coram est illius amplissimam eruditionem admiratus; alter vero (quem D. O. M. communi bono diu servet incolumem) illum est sua benevolentia & existimatione dignatus.


Tanta profecto sapientia, quæ *in malevolam non ingreditur animam, & effugit fictos*, non poterat virtutum ornamentis non esse sociata. Mira fuit in tam eximio & celebri Viro modestia, ab omni fastus & elationis umbra prorsus aliena: quippe qui cum sublimiores posset sibi polliceri

dignitates, honores, gradus: literario siquidem orbi celebris, à Pontificiis Legatis in honore habitus, à supremis Venetæ Reipublicæ magistratibus sæpius in arduis consultationibus adhibitus, eximia sperare poterat: & nihil certe erat in ipso, quo si voluisset a consecutione præpediretur; tamen non solum numquam expetivit, sed etiam oblata nobiliora subsellia, insigniores cathedras, splendida munia, modeste quidem, ac constanter recusavit. Eluxit etiam hæc præclara animi modestia in eius cultu atque convivio. Una siquidem contentus cellula, quam vilis abacus, abiectum sedile, humile cubile replebat: & sola copiosa librorum suppellex non ad pompam, sed ad studium parata, ornabat quidem, sed occupabat, ut sedens moveri vix posset, & advenientes etiam nobiliores viros angusto loco reciperet, in ea constanter supra quinquaginta annos moratus, numquam voluit commutare, licet in novo conobio commodiorem & ampliorum illi designatam decentius posset incolere. Communi semper victu usus est ac vestibus; immo juvenis tantæ fuit sobrietatis, ut triginta annis vinum non gustaverit, & cibo parcus, qui vix ad naturam sustentandam sufficere videretur. Solum in extrema senectute jejunia & abstinencias Ordinis temperavit, & ad consumptas vires reficiendas, leviores identidem potiunculas est frequentare coactus. Suam erga Deum religionem ac pietatem ostendit, tum in quotidiana Missæ celebratione, & quidem summo mane, non sine gravi incommodo, etiam rigidiore hyeme, in quo Superiorum jussa, & medicorum minæ, ut aliquoties ab ea abstineret, vix impetrare potuerunt: tum in reliquis divini cultus officiis, quibus sedulo cumulateque perfundus est. Choro in divinis laudibus assiduus & in extrema senectute; regularis observantiæ studiosus, eam factam testamque servare studuit, & pro virili promovit. Quamobrem Collegium nostrum, totam nostram Congregationem suaviter atque sapienter bis est moderatus, cujus etiam initia, incrementa, statum, brevi quidem sed eruditissimo Commentario complexus, celebriorem effecit. Bibliothecam nostram, cuius perpetuam præfecturam gessit, copiosa & selecta librorum suppellectile ornavit, cumulavitque, pluribus quidem communi aere paratis, ut plurimis etiam amicorum & eruditorum liberalitate sibi donatis.

Sic quidem vixit charus noster; & quomodo obierit, non finunt dolor & lacrymæ attingere, nedum enarrare. Hæc pauca habete. Nullo tentatus morbo, nulla est infirmitate sublatus: senium, ætas, necessitas moriendi extremum induxit agonem, quem vivido sensu cognovit, ac constanter subivit. Quantum eximia sapientia & doctrina in piis viris conferat ad Fidem, ostendit, quum exomologesi peracta, sacra illi fuit delata Eucharistia. Fidei siquidem tunc de reali Christi præsentia actum elicuit, ab intellectu quidem lumine Fidei illustrato elicium, sed ab ardenti & flagrantissima charitate imperatum, quo adstantes omnes in admirationem rapuit, & ad lacrymas provocavit. Sacro est postmodum oleo delibutus, donec tandem tenui ad pectus reumatis affluxu præfocatus, inter Religiosorum preces, Deiparæ auxilium invocantium, quarto Kal. Februarii, surgente aurora, placidissime suo animam reddidit Creatori.

Unum superest ad Epistolæ coronidem, nimirum ut P. T. A. R. tuosque concellitas omnes enixe rogemus, ut pro tam eximio Viro de nostra Congregatione, immo de toto Ordine nostro, & Ecclesia benemerenti, non solum constituta persolvatis suffragia, sed illius in orationibus & sacrificiis vestris numquam obliviscamini. Valete.

Biblioteka Jagiellońska



stdr0023501

